

1880 - Uordens e statuts da vischnaunca tratgs ord ils protocols da vischnaunca entschiet cugl onn 1866, secrets ensemen 1880

“Uorden u statuts da vischnaunca 1866”, aschia senumna l’emprema ediziun d’ina constituziun per la vischnaunca da Tujetsch. Ils reglaments e regulativs avon 1866 ein vegni tratgs ord ils anteriurs protocols, mess ensemen e formau l’emprema constituziun.

Cun “Statuts dalla vischnaunca da Tujetsch” suonda igl onn 1880 la secunda versiun, era messa ensemen ord tuttas midadas ed amplificaziuns dapi igl onn 1866.



A. Statuts generals

I. Radunonza dils vischins (vischnaunca)

§1. La vischnaunca da **Tujetsch** formescha ina part dil circuit dalla **Cadi**, ils dretgs che cumpeteschan alla vischnaunca tenor constituziun cantunala, vegnan executi entras las radunonzas dils vischins da vischnaunca.

§2. La vischnaunca fa en sias radunonzas entras il pli dils leu presents vischins, ils status e reglas da quella; ella legia ora sia suprastonza, las necessarias cumissiuns e ses officials, decretescha las necessarias taglias da vischnaunca e nominescha ed approbescha l’administraziun dils officials, e prosequescha il dretg da prender si vischins, e votescha sur dils pugns da recapitulaziun.

§3. La vischnaunca vegn clamada ensemen entras ils geraus schi savens sco quels anflan per necessari. Als vischins da **Rueras**, **Selva** e **Tschamut** sto ei vegnir fatg enconuscent avon, cun excepziun dils dis che tuts vischinadis ein obligai da vegnir en la farria.

§4. Las radunonzas da vischnaunca vegnan dirigidas dil president da quella, ed il secund gerau ha l’obligaziun da tener in exact protocol sur tuttas ordinaziuns e conclus da quella. Il protocol duei sin l’emprema suandonta radunonza da vischnaunca vegnir legius avon e suttamess a l’approbaziun.

II. Suprastonza u obercheit da vischnaunca

§5. a) La suprastonza da vischnaunca vegn formada ord nov commembers, numnadamein treis geraus e sis cussegliers. Ord ils sis cussegliers legia la vischnaunca ora in statalter ed in salter.

b) La cumissiun da scola vegn formada ord sis commembers.

c) La cumissiun pauperila ord siat commembers, cumpriu en il segnerfarrer. Las duas sura cumissiuns legian ord lur miez in commember sco president.

d) La cumissiun per ir atras ils quens da vischnaunca vegn formada ord dus [stria e cumpletau cun tschun] commembers ord ils differents vischinadis ed il president da quella numna la vischnaunca.

e) La cumissiun dallas alps dumbra quater commembers [cassau quella].

f) Il gerau militaric vegn eligius mintgamai per treis onns tenor lescha.

g) La vischnaunca legia mintg’onn aunc ultra dallas sura cumissiuns aunc ora in urentader da biestga ed in urentader[s] da carn per mintga vischinadi [per la vischnaunca], tenor lescha cantunala.

§6. Ils treis geraus vegnan saramentai sin vischnaunca entras il president cass.

Sarament: Vus sco elegi geraus vegnis ad engirar tier Diu il Tutpussent, che Vus leies cunscienziamein administrar e survegilar ils beins e la polizia da vischnaunca e leies execut exactamein e nunpartischond las concernentas leschas ed ordinaziuns dil cantun e dalla vischnaunca ed en tuts graus, aschilunsch sco ei stat en vies uffeci, suenter vies meglier saver e puder schurmegiar ed augmentar ils interess dalla vischnaunca.

Plaids da sarament: Tut quei ch'ei a mi vegniu legiu avon cun ils plaids e jeu hai bein entelgiu, vi jeu vegnir suenter e salvar cun ils fatgs, suenter miu meglier saver e puder, tuttas caussas a buna fei e senza malart, aschia pilver mei gidi Dieus, la sontga Trinitad, Nossadunna e tut ils sogns. Amen.

Sarament pil pievel: Vus vegnis ad engirar: Che vus vuleis suandar ed obedir a camonds e scamonds d'ina elegida suprastanza tenor meglier saver e puder. Che vus laies ella gidar e mantener bien uorden e dretg en vischnaunca, da purtar tgisas encunter fallonzas e surpassaments, da cun ella promover il beinstar e tschessentar il mal en vischnaunca. Sche vus leies quei empermetter ed engirar sche teni si treis dets dil maun dretg e schei suenter: Tut quei ch'ei a mi vegniu legiu avon cun ils plaids e jeu hai bein entelgiu, vi jeu a vegnir suenter e salvar cun ils fatgs, suenter miu meglier saver e puder, tuttas caussas a buna fei e senza malart, aschia pilver mei gidi Dieus, la sontga Trinitad, Nossadunna e tut ils sogns. Amen.

Il stalter duei aschigleiti sco el ei dalla vischnaunca eligius, vegnir saramentaus sin vischnaunca dil president.

Sarament dil stalter: Vus sco elegi stalter dalla vischnaunca vegnis ad engirar che Vus en tut leies encurir da promover il beinstar dalla vischnaunca, che Vus leies esser in dretg e reclì stalter, tener bein quen da vies prender en e dar ora, haver buna cura da vias, punts e piogns e far buna obedienscha agl obercheit da vischnaunca.

Plaids dils sarament sco sura §6.

III. Regulativs da vischnaunca

- §7. a) La suprastanza ha da menar e survegilar l'entira administraziun da vischnaunca, d'execuir tuttas conclusiuns e da survegilar ch'ils statuts da vischnaunca vegnien observai.
- b) Legia ella ora ils sequents ugaus: ugaus pervenda e caplanias; ils ugaus da tuttas baselgias; igl ugau dalla spenda da graun; igl ugau dalla spenda da pieun s. Vigeli; igl ugau dils paupers, sal e spenda.
- c) Survigilescha la suprastanza l'administraziun dils sura elegi ugaus e pren mintg'on, entras ils treis geraus cul segnerfarrer, giu il quen da tuts ugaus, nua ch'ei duei vegnir mirau ch'ils capitals da quellas ugadias vegnien segirai entras sufficientes pègns.
- d) Censurescha tuts surpassaments da statuts da leschas da vischnaunca.

§8. Tuts conclus ed ordinaziuns dalla suprastanza dueien vegnir a protocol; era dueien tuts secrets d'origin, ils quals vegnan dai ora dil president da vischnaunca, vegni registrai en in agen cudisch e secrets en.

§9. Ils commembers dalla suprastanza retilan in salari da 1.50 frs. per di, quels dis ch'els ston impunder da castigar, conceder la lenna e visitar tetgs e classenas. Per tuts auters dis, che stuessen vegnir impundi per nez e basegns dalla vischnaunca, dueien tenor temps e circumstanzias vegnir indemnissai. Era ei tenor conclus da vischnaunca digl onn 1873 vegniu decretau, ch'il procent per trer en la taglia cantunala, duei oz e per adina udir al president da vischnaunca, il qual sto aber era trer en tala taglia.

§10. Mintg'onn duei la suprastonza render quen da sia administraziun alla leutier destinada cumissiun da quens, la quala duei sin Gliendisdis Tschuncheismas rapportar alla radunada vischnaunca il resultat, nua ch'ei stat sura alla vischnaunca da quel approbar ni buc.

§11. Ils ugaus da baselgias e pervendas (raubas pias) han l'obligaziun da prender enta maun ils quens e quels survegilar ed administrar cunscienziusamein. Sch'ei vegn dau giu capitals, sche dueien ei quels turnar a metter ora sil meglia ch'ei san, adina aber cun far metter pègn. Dues il fondo sin ina u l'otra moda vegnir carschentaus, sche duei era quei vegnir purtau en quen ed administrau sco igl auter. Els miran sur da tuts baghetgs da pervendas e caplanias, che quels vegnien manteni en uorden, en cass aber da reparaturas grondas ein els obligai d'avon solidar la suprastonza, medemamein dueien els era haver quitau ch'ils beins schischents vegnien cultivai scosauda.

Schabegiond il cass, che pervendas ni caplanias fussen vacantas, ein ils ugaus obligai da trer en e dar ora tut quei che croda duront quei temps, per suenter dueien tals raschuneivlamein vegnir indemnissai per sias extra breigias.

Ariguard ils capitals baselgia e pervenda e raubas pias

Negin duei en partiziuns, ni auters cass, puder divider e sparter capitals da raubas pias, sco era messas perpetnas, riugs perpetens, sco era sal, pieun, graun etc. Ils leutier predestinai ugaus ein sut responsablada obligai da mirar, che quei daventi buc, sco era da mirar che tuts capitals seigien adina sufficientamein segirai.

Capitals da raubas pias, san vegnir pagai giu mo da s. Martin (11-11) ni s. Andriu (30-11) e zuar sto scadin, cura ch'el dat il tscheins da s. Martin declarar ch'el detti era il capital, il qual sto allura daventar sil pli tard da s. Andriu.

§12. Il stalter ha da trer en e dar ora il current, tenor quen ch'el retscheiva dils geraus e retscheiva per sias breigias ina paga annuala da 30 frs. Era ha el l'obligaziun da mirar che las punts, vias e piogns da vischnaunca vegnien manteni en bien stan.

IV Il salter

§13. Il salter ei en disposiziun dalla suprastonza ed ha da vegnir suenter a tuts camonds da quella e principalmein dil president. El ha da far tuttas citaziuns e visadas sin ordinaziun dil president ni dalla suprastonza, sco era da dumandar sin vischnaunca ils meinis, far si e decider las tscharnas, priu ora tier elecziuns e fatgs cantunals, nua ch'ei vegn numnau dumbravuschs.

B. Statuts specials

§14. Jasters pon vegnir pri si sco vischins da vischnaunca mo sut las suandontas cundiziuns:

1. ston duas tiazas dils votants esser persuerter,
2. sto il petent pagar en cassa da vischnaunca al fondo general da scola, ina certa summa, la quala vegn fixada dalla vischnaunca.

I. Domiciliai

§15. Scadin burgheis svizzer ha tenor lescha federala il dretg da sedomiciliar en scadina vischnaunca sco vischin, sto aber ordavon dumandar la respectiva vischnaunca per la concessiun da domicil ed impunder en cassa da vischnaunca persuerter ina taxa da 3 frs. Els han il dretg da guder tuts beins communals, sco alps, pastiras ed uauls etc., cun excepziun dil fondo pauperil sco ils burgheis nativs, ein aber obligai da pagar en cassa da vischnaunca ina indemnissaziun a proporziun dils interess ch'els gaudan cheutras.

§16. Era ein ils domiciliai obligai da purtar tuttas taglias e grevezias da vischnaunca sco ils burgheis nativs conform allas determinaziuns dalla lescha sur dils domiciliai da 1875, ella quala ein era numnai si pli detagliadamein ils dretgs da quels visavi allas respectivas vischnauncas, sco era ils regress dallas vischnauncas visavi als domiciliai.

Polizia da vischnaunca

§17. Tgi che disturba il ruaus dalla notg crod'en castitg dalla suprastonza, medemamein era tgi che disturba il survetsch divin. *Cun rispli*: §17 ei cassaus.

Lavurs cuminas da vischnaunca

§18. En mintga vischinadi duei vegnir legiu ora in um, il qual tegn quen las lavurs cuminas da siu vischinadi. Scadin vischin che vegn avisaus tier la lavur cumina e cumpara buc, paga en cassa da vischnaunca in castitg da 2 frs. a di. Ils sura destinai umens dueien a dretg temps dar en tals, ils quals ein buca cumpari tier las lavurs cuminas, sinaquei ch'ei sappi vegnir incassau il castitg. *Remarca cun rispli*: Il present uorden dallas lavurs cuminas da vischnaunca ei cassaus e revedius sin pagina 60, 61 e 62.

§19. Tier las lavurs cuminas ein obligai tuts habitonts da nossa vischnaunca. Il di da lavur cumina vegn quintaus gl'unviern sis ed auter otg uras da lavur. Igl um cun il bov vegn quintaus per dus dis lavur cumina.

Lavur cumina dallas alps

§20. Tuttas lavurs che vegnan fatgas en alps, sco baghiar e reparar tegias, far vias, cavar ora trutgs, mundar etc. vegnan tenidas quen en ina atgna lavur cumina, numnada quella dallas alps. Tuts possessurs da tiers armentivs ein obligai da separticipar vid talas lavurs e zuar aschia che dus stiarls ston far tonta lavur sco ina vacca, ni genetscha e quater vadials era ton sco ina vacca.

§21. Per direger las sura lavurs vegn ei legiu ora ina cumissiun da 4 – 5 commembers.

§22. La lenna dils signurs spirituals, segnerfarrer, caplons da **Sedrun** e **Rueras**, vegn fatga da lavur cumina e zuar aschia: Ils da **Rueras** fan a lur caplon ed ils vischins dador **Dutg Grond** a farrer e caplon da **Sedrun**.

§23. Libers dallas lavurs cuminas da vischnaunca ein ils sequents: igl emploiau civil, il gerau militar, sco era ils calusters dalla farria.

Uorden da scola

§24. Per direger las scolas elementaras dalla vischnaunca els differents vischinadis legia la vischnaunca mintga dus onns ora in cussegl da scola da sis commembers cun il signur farrer vitier e quel legia ord siu miez in president.

§25. Il cussegl da scola ha l'obligaziun e l'autoridad, da cun entelgientscha dils appartenents vischins, pladir ils scolasts per tut las scolas en vischnaunca, sco era leger ora in cassier u ugau, il qual ha d'administrar il fondo da scola general, sco era da mirar sura che las casas da scola ed ils effects enten quellas, vegnien manteni en bien uorden.

§26. Tuts scolasts vegnan pagai ord cassa da vischnaunca, la quala ha aber en quella consideraziun il dretg da trer en il tscheins dil capital dil fondo general.

§27. Quei che va tier l'ulteriura procedura en fatgs da scola, han ils geniturs, affons e cussegl da scola, d'observar las ordinaziuns dil niev uorden da scola cantunal.

Uorden pauperil

§28. Per survegilar e direger il pauperesser vegn ei mintga dus onns legiu ora ina cumissiun pauperila consistenta ord siat commembers. Il signur farrer ei ex officio commember da quella ed ils signurs caplons, ugaus dils paupers, da sal e spenda da graun, san era vegnir tratgs tier. Quella cumissiun ha d'administrar cunscienziusamein ils beins dalla spenda, da mirar che quels vegnien buca sminui, sondern carschentai. Els han milsanavon da reparter la rendita dalla spenda als paupers cun particular risguard dils pli basignus e meriteivels

§29. Era ha la cumissiun da disponer sur las pastiras cultivadas dils paupers ed a quels tenor beinmanegiar dar ora da schar gudar quellas ed aschi savens sco ella anfla per necessari prender ad in e dar ad in auter; era las pastiras ch'ein predestinadas da schar segar e spelar ils paupers, ha la cumissiun da disponer e dar a scadin basignus sco po tucrar ni ils basegns damondan.

§30. La spenda da graun e sal duei buca vegnir partida denter artavels, mobein, ei duei adina vegnir incassau dil possessur dil pègn; vegn in tal pègn vendius ni artaus, sche dueien ils contrahents u artavels far da saver talas midadas en termin da 15 dis als ugaus spenda.

§31. Tals paupers che han retratg almosna e mieran giu senza descendenza e laian anavos facultad, dueien stuer pagar anavos alla cassa pauperila quei valzen ch'ei han retratg ord quella.

§32. Igl ugau pauperil tila en il tscheins ed il sal. Igl ugau spenda tila en il tscheins ed il dumiec; il dumiec vegn rimnaus el cumah dalla spenda, en disposiziun dalla cumissiun, il tscheins annual en daners surdat el, cura ch'el dat giu quen alla cumissiun da quens, la quala surdat quei agl ugau pauperil, il qual cun igl ugau spenda ensemen reparta ora (resalvond il sal) als paupers ton daners sco graun, tenor la gliesta che vegn ad els consignada dil president ni dalla cumissiun pauperila. Quella distribuziun duei daventar regularmein mintga dus ni treis meins, ni sch'il basegns damonda era pli savens.

Il sal vegn daus sulet entras igl ugau pauperil.

Uorden forestal

A. Administraziun

§33. L'administraziun digl uorden d'uauls en sia entira extensiun ei en mauns dalla suprastanza e dil bostger da revier, sut il num cumissiun forestala, la quala ha la survegionza digl uorden d'uauls, sco era il manteniment da quels; ella conceda tutta lenna da fiug e da nez, tenor uorden, sco era ha ella da castigiar tuts surpassaments digl uorden forestal. Ella meina era in exact protocol sur la lenna concedida, sco era sur las classenas da lenn midadas en mir ed in protocol dils castitgs.

§34. La cumissiun forestala ha en sia disposiziun il bostger da revier, il qual ei obligaus d'assignar ora tutta lenna che vegn concedida dalla cumissiun, survegilescha en general ed en special ils uauls ed annunzia alla cumissiun tuts surpassaments digl uorden forestal, sco era d'ademplir tuttas obligaziuns prescettas dil bostger districtual.

§35. Scadin vischin obtegn ina sort lenna da fiug da circa 5 - 6 vaultas (*cargas*) e quei zuar u en schetgas ni en ils uauls cumins tenor beinmanegiar ed ordinaziun dalla vischnaunca, pagond la taxa che vegn da quella messa si. Els uauls astga mintgin encurir ensemen lenna secca, romas, cuschas etc. resalvond els loghens scumandai; miscalgias ei lubiu d'encurir si en tuts uauls, negina roma astga vegnir prida naven, cura ch'ella ei messa ensemen, ni aschiditg sco il best ei aunc leu.

Lenna da baghegiar

§36. Tut quels che giavischan lenna da baghegiar ni reparar, seigi casas, clavaus, chischners ni auters baghetgs, ston ordavon far urentar in commember digl obercheit. Quels dueien allura rapportar siu pareri alla cumissiun forestala, la quala concluda da dar u buca dar, sco era conta lenna dar a scadin petent.

Norma dalla lenna che vegn concedida per baghegiar baghetgs novs

§37. Per ina casa nova dubla cun duas alzadas, duei vegnir dau 120 quaders, dus lenns da slondas e sis lenns d'aissas e zuar la mesadad ord las schetgas e la mesadad ord ils uauls cumins.

Dasperas cun rispli: Tier concessiuns da lennas da baghegiar casas novas, vegn seteniu vid la lescha digl uorden forestal § 2.

Per in clavau cun dus nuegls da 16 armauls dueigi vegnir dau per tetg, lattiu, iral, palancar e pinar ora siat lenns d'aissas e slondas, treis ord schetga e quater els uauls cumins; per tetgals, cassas-iral e suppias diesch quaders ord schetga; per lenns da punt ed ischenchels siat quaders ord uauls cumins, da clavau ed isiarchels 50 ord uauls cumins.

Dasepras: Clavau. Per nuegls da 12 vegn era dau in lenn ord schetga per palancar.

Dasperas cun rispli: Tier la concessiun da lennas da baghegiar auters baghetgs da scadina sort, sco era per reparaturas da tals, vegn medemamein seteniu vid il sura indicau uorden forestal §2.

Per chischners novs e veders duei vegnir dau quei ch'ei necessari tut en las schetgas, priu ora ils aresisens.

Classenas

§38. Tutta lenna da classena duei vegnir dumandada e marcada ora dil bostger; per clauder vegn dau neginas lattas, sondern lenna grossa che sto vegnir fendida ni resgiada, priu ora las lattas suenter il stradun. Per spartidas denter orts ni mises, sco era per clauder en loghens, ch'ei tochen ussa buca vegniu cludiu, vegn dau negina lenna da clauder. Dacheudenvi duei buca vegnir concediu lenna da clauder orts novs, mises ni pastiras che vegnessen urbanisadas.

§39. Las classenas da **Maun Sura** en ed ora ch'ei encunter las pastiras, vegnan dadas ord ils uauls da **Maun Sura**; ils pals sco era autras classenas, vegn dau els uauls da **Maun Sut**. Giu da **Maun Sut** vegn dau classena mintgamai il pli damaneivel dils praus.

Dasperas cun rispli: Ei d'aschunscher al Cussegl Pign §29 dalla „Forstordnung“.

§40. Tgi che mida la classena da lenna en mir vegn pagau ord cassa da vischnaunca 80 rps. per fest; l'altezia e soliditad d'in tal mir sto d'in commember digl obercheit, che mesira quel, vegnir reconuschiu per sufficient ed il possessur ei obligaus da mantener quels dacheudenvi en bien uorden. Era duei sur da quels vegnir tenu in protocol separau, essend che quels pon buca pli vegnir midai en classena da lenn. Ils mirs ston tenor il terren haver ina altezia da 4/4 tochen 6/4.

Dasperas cun rispli: Ch'ei vegni menau in special protocol sur da midadas da classenas da lenn en mirs massivs §29.

§41. Tuttas lennas da baghegiar ni da nez vegnan dadas ora regularmein ina gada per onn e quei aschigleiti sco pusseivel la primavera. Otg dis avon duei vegnir publicau il di che vegn concediu tala lenna. Sin quei di dueien tut quels che garegian lenna da baghegiar, haver observau il far urentar entras in commember digl obercheit.

Quels aber, ils quals duessen negligir d'haver dau en il temps fixau, vegn per quei onn dau negina lenna, resalvond en cass urgents e nunprovedi, po la cumissiun conceder lenna, aber ils petents ston pagar dalla taxa las spesas dalla cumissiun.

Lennas en schetgas pagan sequenta taxa:

in lenn dad aissas ni slondas	6 frs.
in quader	3 frs.
ina latta gronda da chischner	40 rps.
ina latta pintga	20 rps.
la sort da fiug	1 fr.

Lennas els uauls cumins pagan:

in lenn dad aissas ni slondas	1.50 frs.
in quader	1 fr.
in lenn da clavau	50 rps.

Mintga vischin ha il dretg da pinar quater slusels per onn per siu diever; duei aber quels dumandar e pagar 10 raps per slusel alla vischnaunca, sco era far da saver ad in digl obercheit, cura ch'el ha pinau quels.

Tscherchels ei lubiu da pinar en tuts uauls a **Maun Sut** ed era dator **Bugnei**. Schaluns ei lubiu da pinar els uauls cumins gratis, aber mo rauba secca.

Per geinas, scalas, gheislas, per caschar ellas alps, astga vegnir pinau negina lenna.

Per begls, ton els vischinadis, sco era per las aclas entuorn, sto ei vegnir dau in ton pagament, tenor schazegiada dil bostger, ni da tgi che dat ora quels.

Era per ils bischels duei vegnir pagau 30 raps la plonta.

§43. Lattas suenter la via vegn ei dau gratis, suenter ch'igl ei vegniu urentau d'in digl obercheit, schebein ei seigi en certs loghens da basegns da dar duas ni mo ina. Nua ch'igl ei buca necessari basegns vegn ei dau mo ina. Era dueien quellas vegnir dadas e pinadas per igl unviern, cun raschun ch'il lenn ei lura pli serraus e tegn pli ditg. Medemamein dueien quellas lattas era vegnir protocolladas ed urentadas sco outra lenna da baghegiar.

Ariguard il far ora cuscha ei da remarcar il sequent: Da far ora cuscha ed era resgiar qiu quella ei lubiu mo els uauls cumins, sco era ei leu lubiu da ruclar giu quella. Las schetgas aber, nua ch'ins astga bein far ora cuscha, mo buca resgiar giu quella e nua ch'ins sto quella runar giu enstagl ruclar, ein las sequentas:

1. Giu gl'uaul **Surrein** tras en ed ora, priu ora la schetga dalla punt **Baselgia**.
2. Igl uaul **Nual**
3. Dador **Bugnei**, priu ora la schetga da **S. Giusep**.
4. La schetga dadens **Nacla**.

Classificaziun dils uauls

a) Las schetgas da Maun Sura (frias)

§44.

I. Igl entir uaul da **Rosas** sur **Selva**, ord il qual igl ei sut negin pretext lubiu da prender ora lennas, seigi romas, draussa, cavrida, manedels, discharina etc. essend quei uaul cheu sco in necessari schierm per il vitg da **Selva**. Tgi che cunterfagess a quei uorden ei sutaposts ad in rigurus castitg. Era duei cheu vegnir concediu ni vendiu negina lenna giud pei, da vart digl obercheit senza expressiva lubientscha e cuntentientscha dalla vischnaunca e dils vischins da **Selva**, priu ora la lenna sederschida. Ei era da remarcar, che las plontas, las qualas sesanflan sin la pastira vendida a Vigeli Werth, sco era quellas che pudessen aunc crescher suenter, ein proprietad dalla vischnaunca.

A **Tschamut Maun Traviers** ei serrau e fatg schetga serrada la draussa tutta el **Draus Darvun** e l'entira **Val Dervaun** entochen si tier il **Trutg dallas Cordas**. *Cun rispli*: Plinavon la draussa dator **Crest Punt** sut il trutg ora tochen o **Grep Gries** e tochen giu tier l'aua.

II. Igl uaul **Carmihut S. Brida** sur via ora, tochen il fil da **Sumsassi**, vul dir tut quei che penda dadens enagiu, ei era schetga fria. Quei che penda aber encunter **Sudada** duei puder vegnir pinau lenna da clauder, aschilunsch sco ei dretgs, sco era per la punt da **Casti** e **Rueras** etc. Igl uaul sut via, numnaus la **Foppa Tschuppina**, tras en ed ora, ei schetga reservada. Era la **Badugna** en **Carmihut** e vargond enasi tochen sum ei strentgamein serrada, sco era il pinar tortas da scuas sut peina da grond castitg.

III. Igl uaul da **Liez** sco era igl uaul da **Malamusa** ein era omisdus schetga fria. Era eis ei scumandau da pinar draussa silla **Val Pulanera**, priu ora per diever da caschar la stad si **Culmatsch**.

Era eis ei scumandau da pinar ora draussa ed outra lenna ella **Val dalla Rufna**. La draussa ella **Rufna**, naven dalla **Val Tgavrut** anenasi ed a **Tschuppina**, naven dil **Grep Fegnèclè** anenasi ei reservada per diever dils mises e dallas alps.

IV. Igl uaul **Mila**, dil **Fil dil Gendus** si, quei che penda encunter **Mila**, ei reservau per schiarm dils baghetgs da quei mises e duei vegnir priu ora negina lenna giud pei.

V. Igl uaul **Flurin** e **Camischolas**, cumpriu en l'entira **Londadusa**, naven dil spitg dil **Gendus** entochen o **Rodunda** en sia entira extensiun, ei schetga fria.

VI. La **Badugna** sur **Sedrun**, ton quella el prau sco sin pastira, ei schetga fria per schurmetg dil vitg **Sedrun**, aschia totalmein scumandau da prender ora tortas ni pinar la badugna sezza, sut peina d'in fetg rigurus castitg.

VII. Igl uaul **Niregl** naven la sura **Badugna** tras si e giu tochen ora sil fil, vul dir quei che penda encunter il vitg **Sedrun**, ei era schetga fria, scumandau da vender lenna verda giud pei.

VIII. Naven dil spitg quei che penda encunter la **Val Bugnei** tochen l'aua dil **Run** e tochen la **Val Fistatgs**, ei schetga reservada.

IX. Si la **Val**, naven dalla **Val dil Run** e **Fistatgs** tochen la **Val Garviuts**, ei era schetga reservada, resalvond la **Tgauma** e quels loghens per schiarm dils baghetgs.

X. Igl uaul dalla **Val Garviuts** anora tochen **Udatsch** e dil fil giu tochen sur il prau da **Bugnei**, aschia tut quei che penda encunter la **Val Bugnei**, ei schetga reservada.

XI. Naven dil sura numnau spitg tochen ora tier il **Fistatg l'Arschella** ei schetga, ad interim serrada senza cundiziun.

XII. Naven dil **Fistatg l'Arschella** tochen ora sils cunfins da **Mustér** ei schetga reservada.

XIII. La **Val Bugnei**, sut via, dadens e dadora tochen tiels praus, ei schetga reservada.

b. Las schetgas da Maun Sut

I. Igl uaul **Plaun Viradas**, sco era las **Vals** tochen tier ils cunfins da **Curnera**, da l'otra vart dall'aua dils **Tschalers** etc., ei schetga fria.

II. Igl uaul **Nual**, tochen ora tier l'aua **Nual**, ei schetga reservada.

III. Naven dall'aua **Nual** tochen ora tier la **Val Vadretg**, pia uaul **Crest Scadialas** e uaul la **Tgauma**, ei schetga fria, priu ora la draussa si sur en ed ora. *Dasperas cun rispli*: Era la draussa naven dil prau da **Plaun Miez** tochen en la **Val dalla Puzza** giu sut via duei esser serrada totalmein.

IV. Naven dalla **Val Vadretg** entochen la **Val Vallatscha** ei schetga reservada, sco era da leu naven tochen ora tier il **Fistatg dadens la Fontauna**, nua ch'ils da **Surrein** retscheivan l'aua, priu ora igl uaul la **Punt** dadora la **Val Vallatscha**, il qual ei schetga fria, per schiarm dalla punt da **Rueras**; era ei quei toc uaul tochen ora la **Fontauna S. Martin** reservaus per diever dalla punt. Draussas e bostga ei lubiu da pinar mo tochen ora sil fil che sparta la val dil **Prau** dalla **Val Vallatscha**.

V. Naven dalla **Fontauna da Surrein** tochen ora tier ils praus da **S. Antoni**, e sco il trutg dil **Tgom** va si entochen sum, ei schetga reservada per schiarm e diever dalla punt.

VI. **Nacla** la badugna sur via en ed ora, seigi sin prau ni pastira, ei serrada sut las medemas cundiziuns sco la sura numnada badugna da **Sedrun** ed ils possessurs dil funs han il dretg da prender naven mo quellas plontas che sederschan.

VII. Naven dils praus da **Nacla** tochen en tier quei ur, che va dator il clavau da **Burganets** e **Plidettas** si encunter in per tiarms marcai cun ina crusch ch'ein grad sur il trutg che va sur **Grep Ault** enasi, ei schetga reservada.

VII. (*stria*) Naven dils praus da **Nacla** e sco il trutg **Tgom** va si anen entochen **Pardatsch da Stiarls** ni **Val Blaua**, ei schetga reservada per la punt da **Pardatsch** e classena.

NB Sur **Burganets** (*stria*) Denter **Prau Nausch** e **Val Stgira** ei igl aschinumnu uaul dils Gieriets, il qual ei ussa terminaus entuorn entuorn. Pli ei aunc da remarcar che a **Pardatsch** dator la **Val Blaua**, sur ils mises dad artavels Giachen Martin Berther e Gion Rest Monn, ei schetga fria per schiarm dils baghetgs.

NB. (*stria*) Ord il sura uaul dadens **Nacla** ei aunc priu ora in toc uaul cumin, il qual vegn terminaus ella classificaziun dils uauls cumins.

VII. Naven da **Plaun Schlaus** en **Pardatsch** anora tochen olla **Val dil Tsch** e sco il dutg entadem il **Plaun las Cavorgias** vegn giu, entochen en tier la punt **Pardatsch** e la **Val Caltgera** dad enasi, ei schetga reservada sulet per la caltschina e la punt.

IX. Dalla **Val Caltgera** anen, igl uaul la **Cungieria**, ei schetga cumina, era serrada per la punt.

X. La schetga nova egl uaul **Cavorgia** l'entira **Val Vallatsch** da maun dadens anora tochen tiel trutg che va da **Mises Grond** silla **Rieda**. Naven dil cantun oragiu dem dil prau da **Mises Grond** giu encunter il **Fop da Mises Pign** ei tagliau ora pliras cruschs els pegns. Sigl ur sut quei **Fop da Mises Pign** ei in tiarm, che fila giu cun in auter sisum la grava. Schetga serrada ei era quei toc per la punt da **Cavorgia** sura, che va dadens si sco la purteglia dil prau dat si, da quei ur enasi encunter quei tiarm, sigl ur sut il **Fop da Mises Pign**. Era ei aunc da remarcar, che quei uaul sur ils baghetgs dalla **Rieda** seigi schetga serrada per schiarm dils sura baghetgs.

XI. Igl entir uaul da **Claus**, sco el ei dadens, dadora e sisura terminaus encunter uauls e praus da particulars, ei schetga fria.

Da l'otra vart dall'aua encunter **Claus** ei scumandau da pinar ora lennas, seigi da tgei natira ch'ellas veglien.

XII. Igl uaul da **Gieppia**, che cunfina encunter ils praus da **Rein da Claus** e **Surrein** ei schetga fria.

Da remarcar eis ei er'aunc, ch'ei seigi serrau e scumandau da pinar badugna en **Pardatsch** els **Barsch**, priu ora tortas da scuas, bein aber dueien era lura ils tschupials vegnir schanegiai e quei per 6 onns.

(*Dasperas cun rispli*: Ei ussa serrada per in temps nundeterminau. Da pinar tut las tortas per far scuas ei concediu, mo ils tschupials dueien esser schurmegiai.)

Classificaziun dils uauls cumins

I. Dadens **Nacla**, dadens quei crest che va dator il clavau da **Burganets** e **Plidettas** si, anen tochen entadem igl uaul da **Stavel Secs**, ei uaul cumin, resalvont sur ils baghetgs da **Pardatsch** e la **Val da Stavel Secs**, tut quei che penda en quella val ei schetga serrada per schiarm dils baghetgs.

II. Da l'otra vart dall'aua da **Nalps**, dils cunfins da **Nalps** anora, numnu il **Plaun Schlaus**, ei uaul cumin. Sigl intschess d'uaul, che cunfina e schai il pli damaneivel dall'**Alp da Nalps**, han ils pursanavels da quell'alp da magher il dretg da pinar la necessaria lenna per baghegiar novs e reparar ils veders, priu ora sil **Crest Derschlaus**, il qual ei serraus per tgauma.

III. Naven dalla **Val dil Tsch** ed il dutg entadem il **Plaun las Cavorgias**, entochen ora sco igl ur dalla **Val Vallatscha** taglia sidengiu, ei era uaul cumin.

IV. Naven dils cunfins dadora dalla sura numnada schetga nova, l'entira **Val Gierm** entochen tiels cunfins dalla vischnaunca da **Medel**, ei era uaul cumin.

Caltschina

§45. La lenna per barschar la caltschina vegn dada ord ils loghens avon numnai e per mintga salmer ston quels che drovan tala pagar alla vischnaunca 40 raps.

Determinaziuns generalas sur la polizia d'uauls

§46. Tgi che cunterfa ad in uorden u l'auter, seigi da tgei natira ch'ei vul, croda en castitg e duei d'in ludeivel obercheit tenor falliment e circumstanziass vegnir curregius e castigiaus.

§47. Scadin ei obligaus da nudar sia lenna aschigleiti sco ell'ei pinada cun sia noda casa, essend che lenna pinada e buca nudada croda tier alla vischnaunca.

§48. En tuttas schetgas ei strentgamein scumandau da far discharina u da stiarner. Els uauls cumins ei lubiu da far da stiarner, astg'aber vegnir duvrau leutier mo ina scua e risti. Medemamein eis ei strentgamein scumandau en tuts uauls da far dascha, rascha, scorsa, barba ni cavrida. Onns da scartezia da fein sa ei, cun cunsentiment dalla vischnaunca, vegnir lubiu da far dascha e barba. (*cun rispli*: Tgi che cunterfa a quei § croda en in castitg da 1 – 5 frs. per blah ni sac.)

§49. Sut peina d'in grond castitg ei scumandau da far fiug en tuts uauls, sco era da barschar cotgla e dar fiug brui etc.

§50. Els uauls cumins eis ei lubiu d'encurir ensemen romas senza patrun e pinar draussa, plantas da pegn aber giud pei seigi verd ni sec ei scamond da pinar, sco era da resgiar ora ragada, resalvond tala lenna che sederscha ell'aua po scadin prender. Duess ei aber schabegiar che en schetgas ni uauls cumins lavinas duessen devastar ils uauls, ed era per part menar in grond diember da lennas ellas auas, sche astga negin far diever da quellass, entochen che la vischnaunca ha buca concludiu tgei far cun talas lennas.

§51. Tuttas lennas, seigi da baghegiar ni da fiug, ni lenna vendida, duei esser pinada e nudada sin igl emprem da settember (*cun rispli*: miez fenadur), sco era duess tala lenna naven dalla vendita e concedida en in onn esser ord igl uaul (*cun rispli*: vegnir ord igl uaul aschigleiti sco igl ei ina praticabla via da sliusa) (priu cass nunprovedi), cass cuntrari croda quella lenna anavos en disposiziun dalla vischnaunca. Era tuttas romas messas ensemen ston en dus onns esser ord igl uaul. (*striaun la davosa construcziun*)

§52. Da lennas che curdassen giud ils uauls da vischnaunca, sin funs da particulars, ha la vischnaunca il dretg da sepatrunar, sto aber bonificar il donn cheutras caschunau als possessurs dil prau. Vul ella aber schar la lenna sezza al possessur per indemnissaziun, sch'ei ella cheutier era autorissada, el qual cass ella paga ulteriuramein negins donns.

NB. Tier §52 duei ariguard quellass lennas vegnir procediu tenor lescha cantunala §196.

§53. Eis ei strentgamein scumandau da prender ord schetgas lennas, seigi da tgei natira ch'ei vegli, priu ora manedels, senza duvrar uaffens, auter che scua e risti e cuscha en ils uauls sura numnai en paragraf 43. Plinavon ei sut peina da grond castitg scumandau da vender ord vischnaunca aissas ni autras lennas, sut negins pretexts e negina qualitat. (*cun rispli*: Tgi che fa lennas mortas e pli che per siu diever, bein aber per far cun quellass hanletg, ei sut peina da castitg.)

Uorden dils suloms

§54. La vischnaunca ei obligada da conceder a scadin vischin da vischnaunca suloms, seigi suloms novs, ni era per carschentar veders, cura ch'il basegns damonda, seigien da tgei natira

ch'ei veglien, seigi sin prau ni pastiras; aber adina bein capiu, senza donn e pregiudezi d'in tierz; bein aber ei mintgin obligaus da tals suloms dumandar sin vischnaunca. Las medemas observaziuns ein era en vigur per brattar giu suloms.

Per suschnas da lenna sin pastiras vegn dau negins suloms e negina lenna. Era vegn ei concediu negins suloms per tegias a particulars sin intschess dallas alps, resalvond tegias da mises sper baghetgs.

§55. Tuts suloms novs, ni che vegnan carschentai sin pastira, ston vegnir pagai alla cassa da vischnaunca 50 raps tochen 2 frs. il fest, tenor schazegiada da quel che mesira tals suloms.

§56. Eis ei dus u plirs vischins che pretendan per in ed il medem sulom sin pastira, sche duei il respectiv sulom vegnir mess en aucziun e vendius a quel che paga il pli bia.

§57. Tuts suloms concedi sin pastira, crodan anavos alla vischnaunca aschigleiti sco ei vegn sin quels buca baghegiu pli ed astgan aschia buca vegnir claus ora ni fatgs prau da vart dil possessur.

§58. Igl obercheit duei leger ord siu miez in um che sto mesirar e schazegiar tuts suloms novs e carschentai sin pastiras, sco era tener in agen protocol sur da quels.

§59. L'ulteriura procedura ariguard suloms e baghegiar, stipulescha la lescha cantunala.

§60. La vischnaunca duei mintgamai da Tschuncheismas leger ora dus umens dadens e dus dador il **Dutg Grond** per decider giu, schebein il basegns damondi ad in e scadin da baghegiar ni buc. Ils suloms garegiai ston vegnir annunziati ad in u l'auter dils geraus, ils quals notificeschan quei als urentaders. Quels dattan silsunter giu lur rapports als geraus ni alla vischnaunca cul basegns e la davosa decida en davosa istanza. Las spesas pils urentaders pagan ils possessurs dils suloms, sche quels vegnan concedi, e la vischnaunca els cass nua ch'ei vegn snegau. Principalmein ston quels umens far adatg, sch'igl ei avon vegniu abusau cun vender ni brattar suloms per leutras puder cun donn dalla vischnaunca acquistar suloms novs e pli gronds, mo per commoditad.

§61. Per chischners novs e puozs sin pastiras vegn dacheudenvi concediu suloms novs mo encunter pagament.

Determinaziuns ariguard il baghegiar

§60. Tuts nuegls novs ston (*rispli*: san) vegnir baghegiai da mir (*dasperas*: ni da lenn; tiel davos cass sto aber il mir fundamental da quel esser alzaus si ord la tiara da maniera che las preits da lenn seigien da sum e tochen dem totalmein si ord la tiara. Per baghegiar da lenn vegn aber dau negina lenna dapli che sco igl ei usitau da dar pils baghetgs da crap.) senz'excepziun, [cass cuntrari vegn ei dau negina lenna da baghegiar e mantener tals baghetgs.] Ariguard ils irals ei da remarcar ch'ei vegni dau dus quaders per far las cassas ed in lenn d'aissas che sto vegnir resgiaus e fatg igl iral cun aissas. Per lattir vegn era dau lenna grossa che sto vegnir resgiada e lattiu cun aissas. Per encrappar giu vegn dau negina lenna. Per palancar vegn era dau lenna grossa. Canals tetg vegn dau mo per ils tetgs casa e per auters baghetgs mo leu, nua ch'igl ei in fetg frequentau passadi sut en ed ora. Per reparaturas da preits nuegl vegn dau negina lenna.

Revediu 1898

§60. Sto dacheudenvi vegnir baghegiu da crap: casas, nuegls, hettas, tegias, zonas etc. ch'ei sin territori da **Tujetsch**. Sigl emprem da mars sto mintgin ch'ei necessitau da baghegiar, notificar quei alla suprastanza. Quella lai allora metter avon tras in um experimentau il baghetg e quel decida sch'il baghetg seigi „baufälligs“ ni buc ed egl emprem cass tgei lenna ei seigi leutier necessaria. La fin da mars conceda allora la suprastanza, sin fundament da sura indicaziuns, la necessaria lenna. D'in auter temps vegn ei concediu negina lenna, priu ora cass da disgrazias. Il sura vala era per reparaturas.

§61. Tuts lenns da punt ston vegnir fatgs da mir; ei vegn aber concediu da dar la lenna (*stria* e *nudau*: da dar mo in lenn; e *la damonda* eis ei in ni dus per nuegl?) leutier vinavon, sco tochen da ~~cheu~~, per diever da pinar ora.

§62. Quei che appartegn ils chischners, sto ei vegnir fatg tetg sin tuts, sco era nua ch'igl ei pusseivel metter quels si per preit encunter baghetgs; il far tetg sin chischner vegn obligau mo en aschilunsch, sco in sulom per in tal, sa vegnir expropriaus sin ina moda raschuneivla. Stuess il particular aber surpagar in tal sulom, sch'eis el buca obligaus da far tetg sin quel.

§63. Tutta lenna concedida da baghegiar sto esser en treis onns (*rispli*: dus onns) suenter esser concedida, esser messa en effect. Tutta lenna che vegn concedida per baghegiar e duess curdar ora marscha, ha il respectiv petent il dretg da dumandar outra dalla medema qualitat, pagond ina raschuneivla taxa pella marscha.

Tetgs e classenas

§64. La suprastonza ei obligada d'ina gada per onn, suenter esser fatg mundi, urentar tetgs e classenas, sco era da mirar che la lenna concedida avon treis (dus) onns seigi messa en effect. Otg dis avon duei aber vegnir publicau sin vischnaunca, sin qual di quella visitaziun ei fixada.

§65. Classenas e purteglia els vitgs, sco era nua ch'ils pasturs han d'ira atras, dueien esser fatgas si en uorden, sil pli tard otg dis suenter haver fatg mundi ils tiers casa.

§66. Tals che havessen buca rugalau si tetgs e classenas en uorden, *dueien da quels che urentan vegnir castigai tenor merets, cun dar in termin dad otg dis ed havend aunc en quei termin buca fatg tetg e classenas en uorden, crodan danovamein en castitg.

*(tier l'emprema urentada vegnan avisai digl urentader d'en otg dis haver rugalau il muncament da quellas varts. Vegn aunc quei termin spiraus senza executar, sche croda il negligent en castitg smanatschus e fixaus ad el schon l'emprema gada.)

Uorden ariguard Cuolm Bass e pastiras da vender

§67. Tuttas pastiras e pastgs da cauras numnau: **Cuolm Bass**, (*rispli*: ed **Ault**) vegnan ina gada per onn, el meins d'uost, stigiadas ora en sorts e sin publica aucziun vendiu sort per sort, mintgamai a quel che paga il bia e quei mo a e denter vischins en vischnaunca e buca ad jasters.

Cuolm Ault

§68. La pli datier dumengia da fiasta Nossadunna d'uost vegn fatg sin vischnaunca cura schar entscheiver e con ditg schar segar el **Cuolm Ault**, sco era con far pagar, ni era sch'ins vul schar segar gratis.

§69. Tut pavel da brutg (*brui*) e nitschuns ei scumandau da far senza cunsentiment dalla vischnaunca. Duess ei dalla vischnaunca vegnir concediu da senezegiar da tal pavel, sche astga leutier vegnir duvrau mo farcla ni fintschel.

§. Il scumandar da cavar ragischs da vinars sin sorts pastira ch'ein destinadas ni schon vendidas da segar, sco era da pascular giu cun biestga talas sorts.

Ariguard rabitschar a casa il fein a pastg e pastiras, sco era fretg da casa

§70. Tuts feins da **Cuolm Ault**, **Cuolm Bass**, pastiras vendidas, ei scumandau d'ira cun tal fretg atras ils praus e far donn, cass cuntrari crodan tals sut castitg dalla suprastonza. Era eis ei scumandau da schar far donn, entras schar magliar giud il prau ils bos, ils cavals cun prender suenter puleins etc. Tuts surpassaments da quest uorden crodan sut castitg dalla suprastonza. Quest uorden duei era survivir il temps da fretg per tuts praus, entochen descargar.

Era duei scadin ira per vias, viadis e sendas nua ch'el ha dretgs ed era mo cura e cun quei ch'el ha dretgs e cun tut schanetg e mender donn dil proxim.

Tuttas vias, viadis da fretg e sendas, dueien la primavera vegnir rugaladas e messas en in stan praticabel dils leutier obligai; sinaquei ch'ins seigi buca necessitaus da far donn ad auters, muort il schliet uorden en quei risguard.

§71. Eis ei fermamein scumandau, da cura ch'ei vegn mundau, ni era schiglioc schubergiau funs etc., da better crappas, mundems, ni auters materials, silla strada, vias, viadis, ni dutgs, sco era els uals dall'aua dils mulins da **Gonda** e **Sedrun**, sin muschnas e praus d'auters, sco era da metter sin pastiras grondas massas material, sco era sut grundas etc. Tut quels che cunterfan al sura uorden, ston pagar il donn e crodan sut castitg digl obercheit.

§72. Tut segar e spelar els uauls ei tenor lescha forestala cantunala strentgamein scumandau. Era sin pastiras ei scumandau da segar e spelar, resalvond quels tocs che vegnan vendi e nua ch'ei vegn als paupers dalla cumissiun pauperila concediu da schar spelar e segar; medemamein scumadau eis ei era da far ensemen e prender si graschas, da tagliar giu bots e crests per far da stiarner, ni da tagliar si tschespets per barschar.

Determinaziuns ariguard pasturs e tiers la primavera

§73. Aschi baul sco pusseivel duei il president radunar la vischnaunca per sedeliberar cura far mundi. Tuts vischinadis, sco era cautebias d'alps ein obligai da pladir buns e sufficientes pasturs generals, ils quals dueien era ademplir sias obligaziuns.

§74. Tuts tiers che vegnan schai ora sin pastira, dueien vegnir mess sut pastur e tuts tiers casa dueien da tut temps esser enferrai. La primavera entochen cargar ad alp, ha scadin vischin il dretg d'ira cun tut ses tiers, priu ora nuorsas e cavals, en siu mises, adina aber era sut in sufficient pastur. Cheu ei aber da remarcar, che scadin ei obligaus da vischinar en siu vitg tuttina perquei cun cauras e tiers casa e zuar mintgin en quei vischinadi ch'el ha fatg fiug da calonda mars, priu ora sch'el havess ordavon declarau als vischins, ch'el vegni a midar locaziun.

§75. Cura che scadin va cun ses tiers a mises, eis el obligaus d'ira ton sco pusseivel per via, schanegiar da far donn, era vinavon senza paschentar, sco era metter glied sufficienta leutier.

§76. Scadin ei en particular responsabels pils donns che ses tiers fan, sco era ils vischinadis, corporaziuns da mises, sco talas, per donns che tiers da talas cuminonzas duessen far, han aber adina il regress vid ils pasturs, sch'ei vegn mussau ora, ch'il donn seigi fatgs per cuolpa e negligentscha da quels.

§77. Las gaglinas dueien vegnir tenidas en 15 dis la primavera, cura ch'ei vegn arau e semnau, sco era gl'atun 15 dis avon meder.

§78. Scadin vischinadi ei obligaus d'haver in u plirs sufficientes pindrers. Quels ein strentgamein obligai da pindrar tuts tiers che van el prau, seigi da di ni da notg, sco era da mirar sissu ch'ils s.v. tiers-casa seigien da tut temps enferrai. Ils tiers ch'el pendra, eis el obligaus da dar a mauns al patrun da quels, sch'igl ei pusseivel. Sa quei buca daventar, sche ston quels vegnir mess a ferm e sche negin recloma lura per tals, sche dueien quels, sin il proxim firau ni dumengia vegnir menai sin **Cadruvi**. Vegnan els cheu a patrun, sche sto quel pagar las spesas e pindrada. Duessen quels tiers era cheu buca vegnir a patrun, sche vegnan quels ad interim mess sut pastur, suenter haver priu giu la noda d'in genau e schau scriver ora quella, tenor usit ni leschas cantunalas. S'annunzia lura in proprietari, sche ha quel da pagaruttas spesas occurridas. Era ei il pindrer obligaus da dar en alla suprastonza tut quels ch'ei negligents cun enferrar ils pors, ni schar ira ils tiers pils praus, ni che han tiers cun vez e tegnan buc en quels.

§79. Per sia lavur e breigia ha il pindrer il dretg da far pagar sequentas taxas:

per in cavagl

20 raps

per in cavagl per pulein	30 raps
tiers d'armal priu ora vadials	10 raps
vadials, cauras e pors	5 raps
anseuls e purschals	3 raps
gaglinas	1 rap

Vegnan quels tiers pindrai la notg, sch'ei la taxa il dubel.

§80. Scadin pindrer che fa buca sia obligaziun exactamein, duei vegnir castigiaus; medemamein ein era ils vischinadis, che miran buca d'haver sufficients pindrers, sutta posts al castitg digl obercheit.

§81. Duess ei dar il cass, ch'in u l'auter vischin, per mitschar dalla pendadira, less buca enconuscher ses agens tiers e seresultass silsuenter tonaton ch'ei fussen ses, sche sto in tal pagar dubla pindrada e croda en cass da repetiziun aunc en castitg.

Determinaziun specialas nua mintga vischinadi ha da metter e tener ses tiers la primavera e co secuntener cun quels

§82. Cavorgia. Po ils emprems otg dis, suenter far mundi, vegnir cun ils tiers casa tochen neu la **Gieppa**, suenter aber tener quels sin sia pastira da casa. Cavals e nuorsas ston metter en **Plaun Miez** cun ils da **Surrein** e **Rueras**.

Surrein. Po ils emprems otg dis vegnir cun ils tiers casa enagiu il **Drun**, suenter era tener sin sia pastira. Cavals e nuorsas en **Plaun Miez**.

Rueras. Ston metter, cavals, nuorsas e tiers casa a **Plaun Miez**.

Selva. Las nuorsas audan a **Plaun Miez**, tiers casa e cavals vi **Plaun Selva**.

Tschamut. Ha il dretg da metter ses tiers casa, cavals e nuorsas sin sia pastira da casa ad els dada tenor brev da marcau, buc aber en **Surpalits**. Las nuorsas aber pon era ir en sin l'alp da **Tschamut**, ston aber succesivamein suenter la neiv.

Zarcuns e Camischolas. Pon metter cavals e tiers casa sin sia pastira da casa. Las nuorsas si **Valtgeva** cun **Sedrun**, **Gonda** e **Bugnei**.

Gonda e Sedrun. Mettan tiers casa, cavals e nuorsas la primavera si **Valtgeva**, cavals e tiers casa sut in e medem pastur. Ils cavals han l'obligaziun da midar giu mintgamai otg dis a **Valtegeva**, **Cungieri** e la **Val** e zuar tochen cargar ad alp. Aschiditg sco ils cavals vegnan catschai la sera a casa, han quels dad ira per sequentas vias: Naven da **Cungieri** vi **Valtgeva** e da leu dil **Drun** giu. Naven dalla **Val**, dalla **Val Bugnei** giu. Onns tardivs po **Sedrun** e **Gonda** era guder cun cavals e tiers casa ils emprems otg dis il **Drun** sur via, aber aschigleiti so pusseivel ir a **Valtgeva**.

Bugnei. Ha dretgs cun ils tiers casa ils emprems otg dis enagiu ils **Puozs** e suenter sin la **Val**. Las nuorsas e cavals a **Valtgeva**.

§83. Las nuorsas che vegnan messas a **Plaun Miez** dueien esser tuttas sut in ed il medem pastur. Aschigleiti sco ei terrenau, dueien ellas vegnir viultas enasi encunter **Mut** e las **Vals** e pertgiradas leu, (*striaui*: pertgiradas leu) (*cun rispli*: e tenidas si dad ault en ed ora, vul dir **Tgom** e **Nual** e **Mut**) e buca schar vegnir giu da bass, priu ora cura ch'ei dat neivs. Pors e cavals da **Selva** e **Plaun Miez** han per lur cunfin l'aua **Nual**.

§84. Il nurser da **Valtgeva** ha l'obligaziun da tener siadora las nuorsas suenter la neiv mintgamai sco ei vegn terren e ton sco pusseivel tener ellas ord pastira da vaccas, sco era da mirar ch'ellas mondien buca sur il **Krizli** giu sin intschess tudestg e mondien cheutras a piarder, sco era ch'ellas mondien buca silla **Puzza** avon cargar. En cass da malauras u neivs ils emprems otg dis, ein els obligai da metter quellas la notg en zona a **Valtgeva**.

§85. Ils nursers dall'entira vischnaunca dalla primavera ein obligai da catschar giu las nuorsas e zuar senza negina ulteriura indemnaziun els solits loghens sco suonda:

1. Il di avon la fiera **Sedrun**
2. Il di avon cargar ad alp e zuar stavlar stediamein, sinaquei ch'ellas sappien vegnir cargadas.

Duessen els aunc schar anavos enquala, sch'ei els obligai, schigleiti sco els san, u vegnan fatgs attents, da mirar ch'ellas vegnien silla **Puzza**.

§86. Il nurser da **Valtgeva** ei obligaus, da quei di che vegn cargau, catschar sia muntanera a **Plaun Miez** e quella leu metter a mauns al nurser dalla stad. Era il nurser da **Rueras** ei obligaus da leu consignar quei di las nuorsas al medem. Ils da **Tschamut** ein era obligai da consignar sias nuorsas quei di che carga al pastur dalla stad u olla **Val dil Plaun**, ni sil **Cuolm Val**.

§87. Davart il stavlar las nuorsas, cura ch'ei vegn fatg mundi, ei stabiliu il sequent uorden: Quei di che vegn fatg mundi allas endisch uras da miezdi, dueien omisdus nursers, quel da **Rueras** e quel da **Valtgeva**, vegnir ensemen en **Dutg Grond**, aschia che mintgin vesi lura e seigi segirs, che l'auter prendi buca nuorsas giud siu territori, e nua che las nuorsas crodan da quellas uras, dueien ellas vegnir stavladas; e dueien era pagar en quei liug. (*davosa part strihau e nudau cun rispli*: pagar il pastur dueien **Zarcuns** e **Camischolas** aber quel da **Valtgeva**) Era dueien tuttas nuorsas vegnir zavradas e ligiadas avon cargar ad alp, e zuar avonmiezdi enagiu **Surrein** e suentermiezdi a **Valtgeva**. Duess ei esser particulars negligents che zavrassen buc ellas, sche dueien quellas nuorsas che vonzan, vegnir ligiadas e messas a ferm, entochen ch'ellas vegnan a patrun, e per scadina nuorsa ei mess si 50 raps castitg, ultra dallas spesas che pudessen aunc curdar da quellas varts.

NB. Sut castitg digl obercheit ein era quels, ils quals vulessen nuorsas sias ni dad auters, quei di che vegn fatg mundi, ni era ils dis avon, seigi lura sin qual maun ch'ei vegli, essend che quei pudess esser grond donn ad in u l'auter pastur.

NB Il present uorden da zavrada ei ruts e cassaus sut datum dils 4 da fenadur 1886.

§88. Nuorsas da vaccas sin pastira ei scumandau da tener. Encuntercomi ei lubiu da tener ina nuorsa da cauras cun in tschut da tetta, ni dus tschuts, sch'igl ei schumellins, bein aber dueien quellas nuorsas stuer pagar il nurser dalla primavera e dalla stad; ultra da quei era aunc stuer vischinar cun las cauras. (*cun rispli*: aber bein capiu che nuorsas e tschuts da cauras hagien da vischinar e pagar al pastur cun spisa e pagaglia.)

Regulativ per las nuorsas dalla stad

§89. Il nurser dalla stad, ei obligaus da retscheiver l'entira unida muntanera da **Valtgeva** e **Plaun Miez** a **Plaun Miez**, quellas da **Tschamut** alla **Val dil Plaun** ni sil **Cuolm Val** e dad ira cun quellas cun tut quitaun en sur la **Punt da Selva**, dalla **Val da Plaun** si, direct tochen sin la **Puzza** e quellas leu tener e pascular sco suonda.

Tochen gl'emprem settember (*cun rispli*: 5 da settember) ston ellas star silla **Puzza**; lura ston ellas vegnir catschadas via sin l'**Alp Tschamut** (*cun rispli*: tenidas rigurusamein si da sum las **Nurschallas**, **Puzzas dil Lai**, **Laiets** e **Tuma** entochen che las caschadas ein giu da **Tgetlems**) e restar leu aschiditg sco selai, ed il davos pon ellas turnar neu **Val Giuv**. Il nurser ei obligaus da ton sco pusseivel adina tener si ellas ord pastg da biestga. El ei era responsabels per tuts donn che las nuorsas fagessen temps da stad cun vegnir oragiu en praus ed èrs. Cura ch'ei vegn descargau eis el obligaus da catschar oragiu las nuorsas la sera avon a **Dieni** el claus. Il nurser vegn pladius sin publica vischnaunca cul pli dils vischins.

§90. Da prender nuorsas la stad ord l'alp ei lubiu a scadin sut las suandontas cundiziuns: Quei duei adina daventar cun savida dil nurser, il qual duei mirar la noda e tener in'exacta gliesta da tgi e contas nuorsas vegnan pridas ord l'alp e quella purtar tier la zavrada, sch'enzatgi vuless mirar suenter ni far diever da quella.

Uorden dalla zavrada da nuorsas

§91. Negin duei passar el claus da nuorsas avon las otg uras dalla damaun, ni avon ch'ei vegni dils geraus dau lubientscha. Era duei negin ira sur la palera e mirs en ed ora, sco era buca metter nuorsas duront la zavrada ord il claus. Plinavon eis ei scumandau da tunder nuorsas e

nudar tschuts duront la zavrada. Ein ellas zavradas e ligiadas tuttas, sche duei vegnir dau en e nudau si exact, las nuorsas da mintgin. Ord il claus cun ellas van successivamein sco suonda: **Gl'emprem Cavorgia, Surrein, Tschamut, Selva, Bugnei, Sedrun, Gonda, Camischolas, Zarcuns** ed il davos **Rueras** e zuar mintga pur cun las sias dapersei, sinaquei ch'ei sappi vegnir verificau il quantum e las nodas.

Vonz'ei anavos nuorsas ni tschuts buca nudai, sche crodan quels tier a s.Vigeli, priu ora tschuts ch'in u l'auter savess mussar ora ch'ei tettassen aunc da sias nuorsas. Autras nuorsas, las qualas vegnan buc a patrun, ston dil statalter vegnir pridas a mauns, vegnir priu giu la noda e quella schau scriver ora ella gasetta ni el Fegl uffical tenor lescha e nunvegnent lura a patrun, vegnan ellas vendidas e pagau ordlunder las spesas occurridas, il rest croda en cassa da vischnaunca.

§92. Negin particular ha il dretg da pigliar si ni prender enta maun tiers jasters, aschiditg sco igl ei terren; tgi che survegn suenter esser dau neiv enta maun tiers jasters, ei obligaus d'immediat tenor lescha far scriver ora, qualitat, schlatteina e peil dil tier cun sia exacta noda. Vegn quel a mauns, sche sa el dil patrun pretender ina raschuneivla bonificaziun per sia breigia e l'expensa dil schar scriver ora. Dil rest determinescha la lescha, l'ulteriura procedura.

Regulativ ariguard il cargar ad alp

§93. Cun excepziun da tuts tiers, che mintga vischin ha tenor conclus da vischnaunca il dretg da tener a casa, sco era cun excepziun dils vadials, ils quals ei vegn era tenor conclus da vischnaunca lubiu da schar metter en in liug u l'auter; dueien tuts tiers d'armal vegnir cargai ad alp, mintgamai els loghens destinai tenor uorden e zuar mintga specia els loghens predestinai, sco ei vegn dalla vischnaunca stigiou giu e fixau.

§94. Nies present uorden dallas alps, il qual ei fatgs 1873 per diesch onns, stipulescha sco suonda:

Vaccas e genetschas dueien vegnir cargadas ensemen ed han sequentas alps: **Val Val** e **Val Giuv**, il **Cuolm Cavorgia**, **Muot** e **l'Alp da Tschamut**. Pli tard ei aunc vegniu dau vitier **Tgom** e **Nual**.

Stiarls e stiarlas han las alps: **Maighels**, las vals **Mila** e **Strem** cun **Cuolm da Vi** e **Caschlè**, ei fixau aschia, dad ira in onn per specia ellas vals e l'auter onn enta **Maighels**.

Ils vadials ha mintgin il dretg da tener sin sia pastira da casa, ni era da metter quels sin las alps **Tgom** e **Nual**, pon leu aber buca metter quels sut pastur.

Per ils cavals ei dau alp en **Pardatsch da Vaccas**.

(*cun rispli dasperas*: Cun tut ils pasturs dueigi vegnir marcadau la pagaglia en daners e lura buca aunc dau tier da schar prender en da ses tiers ch'audan buc en quell'alp, priu ora ina vacca per diever dil latg al pastur e ch'ils pasturs stoppien pertgirar tuts tiers che quell'alp po purtar, seigi da tgei specia ch'ei veglien e quei tochen ch'ei descarga ni dat lartg ils tiers.)

§95. Concernent il cargar ei fixau che las nuorsas dueien vegnir cargadas otg dis avon ch'ils tiers gronds e descargadas otg dis suenter, sche l'aura lubescha. Da prender da part ils tiers quei vul dir, ir ord l'alp cun quels, ei lubiu ils 20 da settember, ston lura aber star sin l'alp ni sin sia pastira da casa entochen ch'ei vegn dau lartg.

§96. Tier il cargar, sco era ira a mises a **Mulinatsch**, **Milez** e **Scharinas**, ei lubiu d'ira ina gada da **Sudada** si. Schabegiond aber neivs, ch'ins stuess vegnir ord l'alp ni mises, sch'ei in ils respectivs pursanavels autorisau da vegnir dils praus oragiu, ston aber, sch'igl ei aunc buca fatg il fein, turnar anenasi da **Malamusa** a **Liez** entochen ell'alp. Mintgin astga allura schar ora ses tiers sin sia pastira da casa, schigleiti sco igl ei aber terren sin l'alp, sto puspei vegnir cargau.

Tuts s.v. tiers dallas alps, che vegnan pri ord quellas a casa tier cass da neiv etc. astgan avon ils 29 da settember buca vegnir schai ora sillas pastiras da casa sut negins tetels. Da leu naven po aber mintgin ira libramein per las pastiras ni alps cun ses tiers. (Ussa ils 26 da settember.)

Dretg da tener a casa tiers

§97. Mintga fiug ha il dretg da tener, ultra da vadials, dus tiers a casa. Schabegiond il cass, ch'in tier fuss malsauns cura ch'ei carga, ni vegness malsauns en l'alp, sche po quel vegnir tenius ni prius a casa, sto aber vegnir urentaus e renconuschiu d'in urentader da tiers per malsauns. Ha il respectiv vischin, ultra dil tier malsaun, schon dus auters a casa, sche sto el cargar il malsaun aschigleiti sco quel ei restabiliu. In tal tier prius ord l'alp ei obligaus da vischinar en si'alp, resalvond sch'in tal havess avon mo in tier a casa, sche sto el vischinar a casa cun il saun e malsaun. Tuts tiers che vegnan teni a casa, ein obligai da vischinar cun il medem pastur cun spisa e pagaglia en siu vitg.

§98. Als possessurs da cavals ei lubiu da prender ord l'alp, per lur diever ils cavals, diesch dis suenter cargar e diesch dis avon descargar, aber mo el cass, ch'in tal havess avon in tier casa.

§99. Tuts cautevias per las alps da schetgs e cavals dueien vegnir mess, dueien vegnir numnai (*cun rispli*: dalla vischnaunca) cura ch'ei vegn tagliau pustretsch.

Determinaziuns dallas pastiras da casa

§100.

I. **Tschamut**. Entscheiva sil stavel **Bullettas** e la **Val Gronda**, anen entochen l'aua dalla **Val Darvun** e la **Val Darvun** inclusiv, entochen entatier il **Crest da Plaun Pardatsch**; da leu agrads in entochen il trutg il pli sisum dallas **Cordas**. Da cheu naven agrad ora entochen il **Plaun dils Planets**, dadora si tochen si tier ils trutgs da **Plaun Grond**.

II. **Selva**. Entscheiva odem denter las auas dalla **Puzza** e **Nual**, il qual toc ei han da guder comunablamein cun **Rueras**; dadens l'aua **Nual** tut e zuar ensi tochen si tier il **Crap dil Tais**, da leu agrad encunter ils **Aults dils Crauns**, entochen entatier las **Vals**, nua ch'igl ei in pegn da miscalgias per tiem. Cura ch'ei van culs tiers sut en, han ei il dretg da vegnir dil trutg giudem **Surpalits** oragiu, aber senza pascular sin l'alp. Dapli han ei aunc tut il pastg entochen otier igl uaul plantau en.

III. **Rueras**. Giu **Surrein**, igl intschess denter l'aua **Nual** e la **Puzza** cun **Selva**, tut il **Plaun Miez** en ed ora, tochen sils cunfins dall'alp dil **Tgom** anora tochen ils **Greps dil Lag**, *cun rispli*: comunablamein cun **Sedrun**. Dapli l'entira **Malamusa**, entochen el **Drun dalla Vallatscha**; dil maun encunter **Liez** las **Fontaunas** sco il fil dalla **Pulanera** dat giu, il **Davet** entochen sut igl uaul **Liez** en ed ora. Dil maun da **Mila** las **Plauncas Flurin** tochen ora tiel clavau da **Tschuppina**, ensi tochen **Foppa Verda** ed anen tochen el **Drun** dadens ils **Bletschs**.

Camischolas e Zarcuns. Naven dil clavau da **Tschuppina**, cumpriu en **Londadusa** tochen en tier ils **Bauns Strem**, tut la pastira biestg. *Cun rispli*: Naven dil mir anenasi tochen ils **Bauns** han ils da **Gonda** da guder cun els.

Gonda. Ha pastira da casa, tschun dis la **Ruina Plauna** cun **Sedrun**, (cassau encunter la pastira dada giul **Run** als paupers era per **Gonda**) era l'entira **Val dil Run** era cun **Sedrun**. **Valtgeva** e **Vons** entochen en tiel **Drun** sco ils **Bauns da Strem** taglian vi. *Cun rispli*: **Sedrun** ha il dretg d'ira cun ils s.v. tiers casa si **Valtgeva** la stad, quei aber per naven da miez uost.

Sedrun e Bugnei. Tut il **Cungieri** e **Ruina Plauna**, priu ora tschun dis che **Gonda** ha era dretgs, ensi tochen si **Crest d'Alp**. Dapli tut il pastg da vaccas dalla **Val Bugnei**, tut gl'ual **Niregl**, la **Scanziala** e la **Val Custeri**; tut quei oragiu davos **Bagliel**, tut igl uaul **Bugnei** e la pastira el vitg **Sedrun**, giu da maun sut, sco il **Trutg da cauras** va si anen tochen **Grep dil Lag**, cumpriu en il **Drun**, *cun rispli*: ell'ustanza dalla **Punt vedra** e las **Palluttas**, buc aber il **Plaun Vallatscha**).

Surrein. La **Val da Claus**, neu da quest maun la punt cun **Gieppia** vitier, las **Tarviarsas** cul **Sutplauns**, ils **Sutseivs** e **Plidettas**; ils **Barschus** tochen en **Crap Gries**, da leusi encunter **Plaun da Vaccas**, sco il trutg giudem dil **Tgom** va ora. Da l'autra vart dall'aua da **Nalps** las **Ragisch** e

la Rieda, il Plaun las Cavorgias cun ils da Cavorgia ensemen.

Cavorgia. Il Plaun las Cavorgias entochen il Dutg dalla Ragisch u dalla Rieda cun ils da Surrein, ensi tochen la Mutta dalla Foppa dalla Culeischna, e da sum ils aults en, entochen il dutg dalla Val Caltgera. Dapli tut la Val Gierm ensi entochen il Fop dallas Pallas.

Las alps e sias terminaziuns ed untgidas

§101. **Cuolm da Vi.** Entscheiva giu Stavlets e va ora si sul Pastg da cauras ora, cumpriu en las Gondas e va suenter ils cunfins dall'Alp Gendusas da Mustér sidengiu, anen ed ensi, tut quei ch'ei pastira da biestg. Quell'alp ha ils dretgs da schar tgaumar e beiber ils tiers o las Gendusas sill'alp da Mustér ed untgida giu las Foppas entochen giu tier la tegia dils Decrusch cura ch'ei vegn ruhas e neivs.

Val Strem. Naven dallas pastiras da casa da Gonda e Camischolas l'entira val, quei ch'ei pastira da biestg, ha per untgida oragiu sut ils Bauns tochen la Gonda Dadens. Naven da miez settember (20) po ei vegnir gudiu cun ils tiers dil maun da Camischolas, tochen oragiu tier il mir e dil maun da Valtgeva tochen oragiu Plaunca Fadal, *cun rispli*: sco il mir taglia viasi.

Caschlè. Quei che schai denter las vals Mila e Strem, engiu tochen da sum Londadusa en ed ora cun la Foppa Verda vitier. Ha per untgida igl Uaul Flurin.

Val Mila. Naven dalla pastira da casa da Rueras l'entira val, ha era untgida igl Uaul Flurin. Era po naven da miez settember (20) vegnir gudiu la pastira tochen Mila, *cun rispli*: oragium Crest Liung.

Val Giuv cun Culmatsch. Ha igl entir Liez naven dils maghers da Liez e pastira da casa da Rueras cugl entir Culmatsch. Naven dils praus las Surauas cun l'entira Val Giuv, priu en la Plaunca Biala, la Cruna tochen si tier il Crap Gries, dadens ils baghetgs da Milez Sut, viasi encunter il Crest da Tiarms e da leu da sum il fil dallas Bostgas (dils Grugns) enasi. Las Bostgas han Val Giuv e Val Val da guder ensemen. Quell'alp ha neginas untgidas.

Val Val cun Cuolm Val e Tiarms. Dadora sco ei terminau cun Val Giuv, gl'entir Cuolm Val cun Milez e Scharinas, l'entira Val Val e Tiarms tochen ils cunfins digl Uri, cun las Puzzas dil Lag ed anoragiu encunter Muschaneras ei determinau sco il Crest Muschaneras fil'orasi encunter la Gonda dallas Pegnas. Quei toc naven da cheu, entochen si sco la via dallas pegnas vegn enagiu, ei da guder cun ils tiers dall'Alp Surpalits ensemen, per aschiditg sco ils tiers da Surpalits van buca a Maighels. Suenter aber che quels ein stai a Maighels, pon ei buca vargar enasi il Crest Muschaneras. Ha era negina untgida.

Surpalits. Naven dils cunfins da Tiarms sco sura detg anoragiu l'entira Riva entochen ora tier ils maghers, enagiu tochen il Rein e suenter enasi sco l'aua da Muschaneras vegn oragiu. Per schar tgaumar han ins cheu ils dretgs d'ira vi ella Gonda Cuflegl.

L'Alp da Tschamut. Naven dils cunfins da Tiarms dallas Puzza dil Lai, suenter il dutg da Muschaneras oragiu, leu suenter ils cunfins dalla pastira da casa da Tschamut, gl'entir Maun Tarviers, cun Nurschallas e Tuma vitier, encunter Maighels entochen en la Siara. Ei era senz'untgida.

Maighels. Naven dalla Siara l'entira val entochen ils cunfins digl Uri, e da l'autra vart ils cunfins da Curnera. *Cun rispli*: Untgida per cass da neiv il territori denter l'aua dalla Puzza e l'aua Nual sin pastira da casa da Rueras.

Alp da Mut (Muot). Gl'entir Plaun Surpalits sur la pastira da casa da Selva ora, tochen ora il dutg dalla Val Ruinatsch, enasi tochen sum, cumpriu en las Fantanatschas sur las Vals.

Nual. Naven dil dutg dalla **Val Ruinatsch** anora tochen ora sil crest dadens la **Puzza dil Tgom** ed enagiu tochen tier la pastira da casa da **Selva e Rueras**.

Tgom. Dadens naven dils sura numnai cunfins da **Nual**, suenter ils cunfins dalla pastira da casa da **Rueras e Surrein** oragiu. Si suren dil maun dalla **Val Pardatsch**, entochen en tiels cunfins dall'**Alpetta** ed enagiu tochen sisum il **Plaun dalla Tschaffuna** sur **Stavel Secs** e dadora giu gl'entir **Pardatsch da Stiarls**, anora tochen ora tier la pastira da casa da **Surrein**. *Cun rispli:* Il **Pardatsch da Stiarls** ei da guder ensemen cun ils cavals.

Stavel Secs. Anen tochen la **Val dil Run** ni ils cunfins da **Nalps**, ensi sco sura detg encunter il **Tgom** sisum il **Plaun dalla Tschaffuna**, anora tochen la **Val Blaua**.

Pardatsch da vaccas (e da **Stiarls**). Alp da cavals. Engiu l'aua e dadens ils cunfins da **Nalps da Magher**, ensi tochen tier il pastg da cauras, anora la pastira da casa da **Surrein**.

Cuolm Cavorgia. Giu sut ils cunfins dalla pastira da casa da **Cavorgia**, dallas **Puzzas** en, quei ch'ei pastira da biestg tochen ils cunfins da **Nalps**. Encunter **Val Gierm** era tut il pastg da biestg encunter la pastira da casa da **Cavorgia**.

Uorden ariguard ils arvès e fein jester

§102. Tut quels che vegnan en vischnaunca cun tiers suenter il marcau november, *cun rispli:* il temps fixau dalla vischnaunca, ston per quels pagar arvè. Mintg'onn, la dumengia avon s. Martin, vegn ei teniu vischnaunca per fixar cun cons tiers mintga fiug possi vegnir, sco era per fixar la taxa digl arvè da quels.

§103. Per igl onn present exista il sequent uorden (*pli tard strihau*): Mintga fiug astga vegnir en cun ~~quater tiers gronds~~, *Cun rispli:* il fixau quantum tiers gronds, ultra da vadials giuvens e tiers manedels, bein aber sut la clara cundiziun, che negin astga vegnir en cun tiers per in auter, sco era (denton) eis ei buca (aber) lubiu, da brattar giu (ina gada per onn in) tiers, ~~quei vul dir: vender in tier e cumprar in auter, senz'arvè~~, priu ora ils tiers che vegnan piars, han ils ins dretg da remplazzar cun auters dalla medema qualitat, senza arvè. *Cun rispli:* dalla medema specia senza arvè, daventond quei el termin dad in meins ni marcau da **Glion** a l'auter, cun l'obligaziun da notificar immediat alla suprastanza. Per in tier piars han ins il dretg da vegnir en cun in auter dalla medema qualitat senza arvè e quei senza ulteriuras terminaziuns dil temps.

Aschia paga:

in cavagl	17 frs.
ina vacca	7 frs.
ina mugia	6 frs.
in stierl	4.50 frs.
in vadi sur sis jamnas	3.40 frs.
in vadi sut sis jamnas	1 fr.
cauras, nuorsas e pors sut in onn	1 fr. il tgau
pors sur in onn	2 frs.

Fein jester

§104. Sut fein jester vegn capiu tut fein che crescha ordeifer ils cunfins dalla vischnaunca, era sch'il funs ei proprietad d'in vischin da vischnaunca, sco era tal fein che vegness da particulars cumpraus ord vischnaunca.

Per fein jester, sto vegnir pagau la tschuncheisma vedra, frs. 2.50 (1.60). *Cun rispli:* pil cubicmeter 20 cts, ni la tschuncheisma 1.60.

Duess ei fruntar onns, ch'ei dess en vischnaunca buca da cumprar fein, ed in u l'auter fuss aschia sfurzaus da cumprar ord vischnaunca, sche ston tals buca pagar per fein jester.

Taglia da vischnaunca

Sin tiers ei mess si sco suonda:

per in cavagl	1 fr.	(2.40 frs.)	(4 frs.)
(pulein)		(0.60 frs.)	
per vaccas e genetschas	0.50 frs.	(1.20 frs.)	(2 frs.)
per stiarls e stiarlas	0.25 frs.	(0.60 frs.)	(1 fr.)
per vadials	0.15 frs.	(0.30 frs.)	(0.50 frs.)
per cauras, nuorsas e pors	5 rps.	(0.15 frs.)	(0.25 frs.)

Cun rispli: Dapli mintga 2 frs. arvè che in particular paga taglia da tiers, in di lavur cumina.

Davart il spazzatgamin (Caminfeger)

§105. La vischnaunca ei obligada d’haver in bien e sufficient spazzatgamin, il qual ei obligaus da schubergiar tuts tgamins bein ed endretg duas gadas ad onn, per il prezi sco vegn cun el accordau. El ei era obligaus da bein urentar tuts tgamins ch’ei seigien sufficient ed en bien stan e cass cuntrari cunscienzusamein rapportar alla suprastonza, sco era rapportar, sch’ei fuss da quels che lessan buca schar schubergiar ils tgamins.

Duess el schar muncar da far ina u l’altra obligaziun, sche duei el tenor circumstanzias vegnir struffegiaus ni era relaschus.

§106. Scadin vischin ei obligaus da schar schubergiar tut ses tgamins duas gadas ad onn, sco era da pagar bein ed endretg il spazzatgamin tenor accord, plinavon eis el era obligaus da reparar ni far da niev tuts per nunsufficients declarai tgamins, cass cuntrari, vegnan tals tgamins fatgs u reparai sin sias spesas, ed el croda lu era aunc en castitg dalla suprastonza.

Cun rispli: Sch’ins vul admetter cheu il regulativ digl uorden da fiug circuital.

Meister mustregia

§107. La vischnaunca duei mirar d’esser provedida cun in bien e sufficient meister, che vegni exactamein a cumparer tenor accord fatgs cun el e rugaleschi ils tiers, che vegnan ad el mess avon. Era tuts vischins ein obligai, da da lur vart ademplier lur obligaziuns visavi al meister, sco ei vegn mintgamai stipulau el concernent accord.

Uorden ariguard pigliar talpas

§108. Concernent il pagament, il qual la vischnaunca, dat a particulars ni vischinadis, per pigliar talpas sin ses funs, ei stipulau il sequent: Vegn ei fatg in accord cun in u plirs pegliatalpas, per in prezi fix, sche paga la vischnaunca la quarta part dil marcadau pagament. Vegn ei aber marcadau da pigliar per in ton la talpa, sche paga la vischnaunca la quarta part mo lura, cura ch’ei vegn marcadau per talpa buca dapli che 50 raps l’ina.

§109. En consideraziun d’in grond donn che las talpas fan onn e mintg’onn, ei dalla vischnaunca vegniu ordinau da far mintg’onn ina devoziun, la quala ei schau sura a nos signurs spirituals sin tgei di e sin tgei moda far, bein aber duei quei di vegnir tenu firau, entochen che la respectiva devoziun ei vargada.

Obligaziuns visavi agl uorden sanitaric dalla lescha cantunala

§110. Tuts dalla vischnaunca eligi urentaders da tiers e da carn, ein obligai da survigilar ariguard la sanadad dils s.v. tiers. Ha el dubis ch’ei seigi avon maun malsognas, sche ha el l’obligaziun, d’immediat intercurir e dar part alla suprastonza.

Quella medema obligaziun, da dar part alla suprastonza, sch’ei semuossa malsognas vid ses agens tiers, ha era scadin vischin sut peina da castitg.

Sevirifichescha ei, ch’ei existi ina u l’altra malsogna contigiusa, sch’ei la suprastonza obligada d’immediat schar saver il docter districtual, sco era da prender ad interim las necessarias mesiras, per buca schar serasar talas malsognas pli lunsch.

Scadin vischin che piarda in u l’auter tier ei obligaus da schar urentar quel, igl urentader da siu

vitg; anfla quel ch'ei seigi vid quei tier zatgei contigius, ha el l'obligaziun da quei notificar alla suprastonza.

L'ulteriura procedura ariguard igl uorden sanitaric, ei da ver en la respectiva cantunala e federala.

Radunonzas da vischnaunca obligatorias

§111. ein las sequentas:

1. L'emprema dumengia da mars per metter calusters ella farria.
2. Gliendisdis Tschuncheismas, per dar giu il quen da vischnaunca e mintg' auter onn leger ora la suprastonza e cumissiuns etc.
3. La dumengia il pli datier dalla fiasta Nossadunna d'uost (15-08), per fixar cura e con ditg schar ira el **Cuolm Ault**.
4. La dumengia, la pli damaneivla da s. Placi (11-07) per stabilir il di da cargar la biestga ellas alps.
5. La dumengia avon s. Martin (11-11), per fixar ils arvès dils tiers e cun cons schar vegnir en.

§112. Era sto ei vegnir teniu vischnaunca aschi savens sco 30 vischins garegian.

La sanctificaziun dallas sondas

§113. Las sondas ei da nos antecessurs vegniu priu si da far miez di firau, principalmein per schurmetg dalla dumengia, quei ei da capir, che sin la sonda duei vegnir fatg quellas lavurs da casa e begl, enstagl forsa far quellas la dumengia.

Era nus essan, avon paucs onns unitamein s'obligai da far miez di dalla sonda firau, e zuar sco suonda:

Naven da s. Placi (11-7) entochen s. Michel (29-9) vegn avonmiezdi teniu ina processiu a Nossadunna a **Zarcuns** e zuar duei l'entira vischnaunca dador gl'uaul, leu seredunar stediamein; leu vegn teniu survetsch divin e suenter tuornan las processions anavos, mintgina en siu liug e mintgin po suenter ira tier sias lavurs. Era **Selva** e **Tschamut** dueien observar il medem cun ira mintga sonda a **Tschamut** cun processiu, nua ch'ils da **Tschamut** ein obligai d'ira a **Selva** e cumpignar si quella, etc. sco sura detg.

Da s. Michel entochen s. Placi vegn fatg firau suentermiezdi, nua ch'ei vegn allas dudisch tucchau il zenn grond per in avis da serasontga. Entuorn las duas vegn fatg viaspras e rusari. Ton la stad avon messa, sco igl unviern suentermiezdi, ein tuttas lavurs servilas ordaviert scumandadas.

La sanctificaziun da firaus e dumengias

§114. Firaus e dumengias e fiastas, ei sut peina da castitg stregn scumandau, tuttas lavurs servilas e da casa, da disturbar il ruaus dalla dumengia cun trer ensemen il latg sin publicas plazzas, buca catschar tiers vi e neu senza extrem basegns; buca vender e cumprar ni far marcaus e giugar sut il survetsch divin; buca refierer da better ord nuegl sin in firau ni dumengia per pli buna peda; buca purtar feins, sternems etc. d'in baghetg en l'auter senza extrem basegns; era buca schar vegnir tgauns en baselgia.

Sin tuttas fiastas, sco era tier nozzas, duei dacheudenvi buca vegnir sittau cun buis, sonder mo cun murters.

Ils calusters e sias obligaziuns

§115. Ultra dallas obligaziuns en baselgia, prescrettas el cudisch da S. Vigeli, ed ultra da tut quei, che siu stan damonda, han ils calusters aunc las sequentas obligaziuns:

1. Mintga fiasta, dumengia ni firau, sco era dis da baras e caudonns, duei vegnir tucchau l'autra

in'ura avon tucrar da messa e zuar clar e bein; fiastas e dumengias circa mes'ura e firaus circa in quart d'ura.

2. Da miert duei vegnir tucrau il zenn grond e zuar per tuts tuttina; 15 minutas cun reparter en treis cuors, aschia ch'ins sappi distinguer, ch'ei seigi tucrau da miert. Ils cuors da bara, duei vegnir fatg il medem, aber cun ils treis zenns gronds.

3. En cass da barschaments ein els era obligai da tucrar da stuornas e zuar aschi spert sco pusseivel. Ei duei vegnir tucrau empau in ed empau l'auter zenn e suenter puspei d'ensemien per saver distinguer, pertgei ei vegni tucrau.

4. Tier smanatschontas auras stempradas temps da fretg, duei vegnir tucrau sepudent tut ils zenns, aber buca pli che diesch minutas.



Dunna naschida el 19avel tschentaner - igl onn che sura constituziun ei vegnida tschentada si! Ei setracta da Maria Carmelia Beer (16-07-1880 - 18-06-1963) maridau Gion Antoni Monn, bostger, (24-08-1880 - 26-12-1955), omisdus da **Sedrun**.